

Tii te Paulo nge céii lépwo Kolosé Atabuhi ko a tii

Woo na e tii a tii ce?

Wo Paulo, pa apostolo. Ke e mu pelen wo Timoté.

E tii éniile?

Ha awieme a jo 60 me 62, ha a bécéiuhe bwo mu he karépu te Paulo ne Rome (*Apostolo* 28.30–31). Ha a benaamwon naa, ke e tii ni tii na paa: a tii ce, nge céii lépwo Kolosé; ke a tii nge céii Filémon; ke ni béé tii mwo nge céii lépwo Filipi; me lépwo Éféso. Hiwon ni pwooti ne ha a *Tii nge céii lépwo Kolosé*, na piwien me ni pwooti na e ha a *Tii nge céii lépwo Éféso*.

E tii me dee?

Me de ni acéihi ne Kolosé, a pwomwo ubwo ha a province Asia (a amu Turki jena), ha a benaamwon na lé pihuô nelang wo lépwo Roma. Wo pa céiu apulie na a niin pie Épafras, ke e pipatemehi telé a Pwooti Wâé ko Iésu he ni jo 52–55, ânebuhe a bwo mu telu ibu he karépu me Paulo.

É ko ade na e tii?

Hiwon mu ko lépwo acéihi mu Kolosé na time lé uce Juif. Ke time lé uce temehi ni patén de Padué. Pwo ni béé apulie na lé pipwohuô telé ko ni pune na gele. Be lé pii telé pie, a éénye, ke a

naado na ta, kehe wâé heme nye âcehi ni patén na binyi, beme nye te junihe pipwoiipikenye. Ke lé pii mwo pie, wâé heme nye pipaunu ni âcélo. Atí ninaa, ke ni naado na gele, be ni naado na piâ ité koja a ju Pwooti Wâé ko Iésu.

Ade ace âne a tii ce?

E pipwodéén wo Paulo, be te mang a céihi te lépwo Kolosé. Ke e pamwoiulé, beme lé te mu ha a ju pune ko Kériso, kehe me time lé uce piâ ité kojan. Wâé heme nye pipaunu cehi Padué me Kériso, be woilu na lu pihuô ne ko ati ni naado ne pwo bwohemwo, ke é he miiden. Ke e pii mwo wo Paulo pie, te a céihi tenye ne ko Kériso na e o pwo me wâé te Padué genye, kehe time uce ni patén de ni apulie. A ju patén denye, ke e mu he ni pwonimenye, ke te tice aceli me e ciekenye mwo, wogenye na nye mu he Kériso, be pwohewiin heme nye caa mele, ke mulie cemwo me weeng.

A bwomune a tii Kolosé

Pipwobwocu me ni pwopwoiitihi (1.1–14)

Wo Kériso ke pa junaado koja ati ni naado (1.15–23)

A penem de Paulo me de ni acéihi (1.24–2.5)

Geé mu mang ko Kériso (2.6–15)

Ni patén na gele: Nemwo pipéce ne kolé (2.16–23)

Genye mulie ha a mulie he Kériso (3.1–17)

Ni pwomwo na lé céihi (3.18–4.1)

Bénebwéne pwooti me a bépinelé (4.2–18)

Pipwobwocu

1-2 Woéo Paulo na é pwotii lé céiikewé, wogewé lépwo apulie te Padué, ne ha a pwomwo ubwo ne Kolosé. He wogemu me Timoté, pa acéihi béénye. [Ke e pwobwocu tewé mwo.] Woéo pa *apostolo te *Kériso Iésu, âcehi ana nime Padué kon. [Be e pahedeéo ngen, me é pii beetihi a pwooti ten.] Ke wogewé, ke e pipégalikewé, beme ni apulie ten, me geé piténeeng, be céiu gewé me Kériso. Wâé heme e mu pelewé a *pipwoééhe tice ja kon me a péém na e âbé mu pele Padué henye. Adéikewé!

A pwopwoiitihi te Paulo

³ Geme te cuwo ko pwoiitihi me dewé, ke geme te cuwo ko pwo-olé te Padué, pa Caa te Padaame Iésu Kériso. ⁴ Be geme téne a jepule ko a céihi tewé ne ko Kériso Iésu, me a pwonimewé ko ati ni apulie te Padué. ⁵ Ke geé wonaa, be geé ucéihi ne he ni céihi tewé ni *adéihi na e pipwopweehi me dewé ne he *miiden wo Padué. Ke geé caa temehi anaa, he li geé caa mi téne a *Pwooti Wâé, a pwooti na e juuju, ⁶ ke e ko piubwo ngen ati pwo a bwohemwo, ke e ko taatééhi a mulihe ni apulie, na ati he ni piduaan. Ke e pébé ni adéihi ne huîilé*. Ke e caa te wonaa ne pelewé, tabuhi ha a benaamwon na geé tabuhi téne hen, ke geé caa te mi temehi a juuju ko a pipwoééhe tice ja kon de Padué, [me denye lépwo apulie].

⁷ Be e pé lé céiikewé a pwooti naa wo Épafras, pa bééme ko penem. Pa apipenem na e piténe

1:3 1.3-4 Éfeso 1.15,16 **1:5** 1.5-6 Éfeso 1.13; 1 Pétéru 1.4

* **1:6** 1.6 2^e & 3^e phrases—Grek: E ne ni acehin. **1:7** 1.7-8
Kolosé 4.12; Filémon 1.23

Kériso, ke e penem me dewé†. ⁸ Ke e piuti teme mwo a pipwoééhe na e ne kowé na a *Jenen Iitih.

Geme pwoiitih me dewé

⁹ Tabuhi ha a tan na game téne a jepule kowé, ke time uce mwaale game ko a bwo pwoiitih me dewé. Ke game ilehi koja Padué pie, me e ne tewé a bwo temehinaado na e pwaadeniin bé na a Jenen Iitih ten, beme géé temehi ehi ana nimen kon. ¹⁰⁻¹¹ Ke me wonaa, ke géé o bo mulie pwohewii ana nime Padaame kon, ke géé bo pwo ati ce pétaapwo bwomunen celi wâé ten. Ke o bo junihe ubwo ace bwo temehi Padué tewé na te nihe ubwo nang ne ha a wâé ten. Ke e bo ne ace niuhewé ko a junuun na te nihe ubwo, beme géé cumang, ke me géé te picani, ke me te piwâénimewé ne ha ati ni naado na e o tuie ne kowé.

¹² Ke géé bo pwo-olé te Caa. Be e ne tewé a mwomwon beme géé hegi mu ko ni adéih ten na e pipwopweehi, beme ni de lépwo apulie ten, na lé mulie ha a pwéélang.

¹³ Be e celuimikenye mu ha a pihuô he a mwametau te a melepiing. Ke e péékenye nge ha a Mwametau te pa Naîn, na te nihe eânimen den. ¹⁴ É mu ko pa Naîn, ke e caa tuwokenye, ke e caa pineuhi ni ta pwo tenye.

Wo Kériso ke pa junaado koja ati ni naado

† **1:7** 1.7 Me dewé—ai Me dong ne pelewé. **1:9** 1.9 Éféso 1.16,17 **1:10-11** 1.11 Éféso 1.19, 3.16 **1:12** 1.12 Éféso 1.11,18
1:13 1.13 Luka 22.53; Éféso 2.2 **1:14** 1.14 Éféso 1.7

15 Time uce jan me nye ali Padué.
Kehe icehi ana wo Kériso,
ke pa déme Padué na nye alieng.

[Be e pwohewii Padué,
na ati he ni bwomunen.]

Pa Naïn, na e ânebuhe
ati ni naado.

Ke e piwéden koja ati ni naado
na e tabuhi wo Padué‡.

16 Ati ni naado,
ke tai tabuhi mu kon:
ati ni naado jeda he miiden,
ke éni pwo bwohemwo;
ati ni naado na nye alihi
me nina time nye uce alihi;
ati ni jenenaado me ni junuun;
ati ni apihuô, me ni daame,
ati ni mwametau
me ni mwodaame.

Weeng na e tabuhi
ati ni naado me den.

Be ana nime Padué kon,
ke wo Kériso na e pacuwohi§.

17 Caa te e lang ânebuhe ati.
Ke ati ni naado, ke âbé mu kon,
ke e te cilelé ehi.

18 Weeng ke pa Puni a één,
[Padaame he] a Mwaiitihi,
a puapulie ten.

1:15 1.15 Ioane 1.18; 2 Korénit 4.4 ‡ **1:15** 1.15 Dernière
phrase—Grek: Pa cuwo ati ni naado na e tabuhi. § **1:16**

1.16 Weeng na e tabuhi ati ni naado...wo Kériso na e pacu-
wohi—Grek: Ne ati mu kon me den. **1:17** 1.17 Ioane 1.1, 8.58

1:18 1.18 Apostolo 26.23; Éféso 1.22–23; Pii Beetihi 1.5

Weeng na e ne a mulip*.
 Weeng pa apulie na e mi
 mulie cemwo mu ha amele.
 Weeng pa bécéiuhen kojale ati.

¹⁹ Ke wâé te Padué
 me e paai pa Naîn,
 ati ne he ni bwomunen.

²⁰ É mu ko pa Naîn,
 na e ne a péém wo Padué,
 ne ha awieme weeng
 me ati ni apulie,
 ke ni naado ati
 na élé éni pwo bwohemwo,
 ke é jeda he miiden.

Wonaa mu ko a cewéhe Kériso
 [he li e mele ne ko a *kuricé].

E caa ne a péém me wogewé

²¹ [Ni pwooti naa, ke e cihe me dewé mwo.]
 Be é ânebun, ke geé te pimu ité koja Padué, ke
 li geé téétieng, ke geé cubwonieng ko ni bwo
 niimihinaado tewé, me ni huô tewé na ta. ²² Ke
 é jenea, ke wo Padué, ke e caa ne a péém ne
 ha awiemewé me weeng. Be e â pa apulie wo pa
 Naîn, ke e mele [ne ko a kuricé] beme e péékewé
 nge he pwahamii Padué, beme geé iitihî. Ke me
 te tice ta kowé celi me e bo tautikewé kon.

²³ Wâé heme geé cumang ne he ni céihî tewé.
 Geé nemwo piâ ité koja a Pwooti Wâé na geé caa
 hegi, be weengaa a watihe a céihî tewé. É mu
 ko anaa, na geé ucéihî ne he ni céihî tewé ati ni

* **1:18** 1.18 Weeng na e ne a mulip—Grek: Weeng, ke pa atabuhi
 kon. **1:19** 1.19 Kolosé 2.9 **1:20** 1.20 Éféso 1.10, 2.16 **1:21**
 1.21 Roma 5.10; Éféso 2.12 **1:22** 1.22 Éféso 2.14–16, 5.27

adéihi te Padué†. A Pwooti Wâé naa, ke caa pii beetihi pitihî a bwohemwo. Ke woéo Paulo, ke pa apipenem den.

A penem de Paulo me de ni acéihi

²⁴ É ne ko woéo, ke é pipwodéén ne he ni picani me dewé. Be é ko pé a âneule mu ko ni picani te Kérîso me de a één, na a Mwaiitihî ten.

²⁵ Be e pahedeéo wo Padué, beme pa apipenem de ati nîna lé céihi ne kon, beme é pii beetihî tewé ati ni Pwooti Wâé ten: ²⁶ ni pwooti ko ni bwo niimihînaado ten na e caa pacuwohî beme denye. Ânebun, ke mwo te e ha *aduwo, ke mwo te tice apulîe celi lé temehî. Kehe é jenaa ni, ke e caa patemehî tenye, wogenye a puapulîe ten.

²⁷ Be nîmen me nye temehî pie, te junîhe ubwo ke te junîhe wâé a adéihi na e pwo me denye. A naado na nihe ubwo me de ati ni puapulîe, kehe time uce a de cehî lépwô *Juif. Ke weengi a ânen: E mulîe konye wo Kérîso! Ke é mu ko anaa, ke nye temehî pie, genye bo mu ha a bwo ubwo na a wâé ten‡.

²⁸ Ke weengaa kutî a watîhen me geme pate-mehî Kérîso te ati ni apulîe. Ke geme pacîhelé me pacémunîlé ko ati ni bwo temehînaado na e kome. Geme wonaa, [beme geme péélé nge pele Padué] ke me lé cumang, ke me oba jélé [ko ni céihi telé] ne ko Kérîso. ²⁹ Weengaa kutî, na é

† **1:23** 1.23 3^e phrase—Espérance. **1:25** 1.25 Éféso 3.2,7–8
1:26 1.26 Roma Roma 16.25–26; Éféso 3.5,9 ‡ **1:27** 1.27 Grek:
 Nîmen me lé temehî a adéihi ne ko ana neduwohî, me de ni bele.
 Weengi: Wo Kérîso, ke e mu kowé, ke weengaa a watîhen me
 géé ucéihi a wâé ten. **1:29** 1.29 Éféso 3.7,20; Filipî 4.13

ko mwoiu ko penem ko a junuu Kériso na nihe ubwo, na e ko penem kong.

2

¹ Nimung me geé temehi pie, é mwoiu ko penem me dewé me lépwo acéihi na élé Laodicé, me lépwo béén mwo na time uce téele pitapitikeme. ² Be nimung me é pamwoiukewé ati, beme céiu gewé ne ha a pipwoééhe, ke me geé mwoiu ne he ni céihi tewé [ne ko nina e pwo wo Padué]. É mu ko anaa, na geé temehi ehi *a bwo niimihinaado ten me denye, ana e ha aduwo ânebun. Ke a bwo niimihinaado naa, ke wo Kériso.

³ Ke weeng na e mu kon ati ni wâé ne ha a bwo temehinaado, me ni pitemang de Padué na te neduwohi [ke te weeng cehi na e habwii tenye].

⁴ É ko pii tewé ninaa, beme o te tice apulie celi me lé o âdé pihaamikewé ko ce bwo cihe télé celi ju wâé heme geé téne. ⁵ Be é hemepie caa woéo ité kojakewé, kehe é te niimikewé*. Ke é te junihe pipwodéén he é téne pie, te ju wâé ni mulihewé, ke geé pipwoiipikewé, ke geé cumang ne he ni céihi tewé ne ko Kériso.

Geé mu mang ko Kériso

⁶ Geé caa hegi Kériso Iésu, beme Padaame hewé. Ke wâé heme geé mu mang kon, ⁷ [pwohewii ni acuwo] na pwo waan [ne ha a

2:3 2.3 1 Korénit 1.24,30 **2:4** 2.4 Roma 16.18 **2:5** 2.5 1 Korénit 5.3 * **2:5** 2.5 É te niimikewé—Grek: É mu pelewé ha a jenen. **2:7** 2.7 Éféso 3.17

pule na wâé]. Ke me geé mu mang ne ha a céihi li geme caa pacémunikewé kon [pwohewii a mwa na bahi] ne pwo a paan na mwoiu. Ke me geé tee pwo-olé te Padué mu he ni ju pwonimewé.

⁸ Geé nemwo pwo me lé pihaamikewé wo lépwoce béén ko ce âpicaanaado celi gele. A pwooti telé [ke nihe wâé heme nye téne] kehe icehi ana te junihe piticenaado ne kon. Be te ni bwo niimihinaado me ni bwomu te pa apulie, na e âbé mu ko ni duéé[†], kehe time uce ace pwooti celi e âbé mu ko Kériso.

⁹ Ke é hemepie pa apulie pwohewiikenye wo Kériso, kehe icehi ana te piwielu me Padué Caa[‡], na ati he ni béé bwomunen. ¹⁰ Ke me oba gewé ko a mulip na geé caa hegi, é mu ko anaa, na geé te mu ko Kériso. Weeng na eten ati a mwomwon, ke pwojunuun ne ko ati ni pihuô me ni duéé.

E caa ne tewé a ju mulip

¹¹ Me geé âbé céii Kériso, ke pwohewiin heme *pwotegoop tewé. Kehe a tegoop naa, ke time uce pwo ne ha a éé apulie, [kehe ana e pwo ne he ni pwonimewé]. Be wo Kériso, ke e pétaabwon nina e teko pwo me nye âcehi nina ta.

¹² Be li caa puukewé, ke [pwohewiin heme] caa neduwokewé ibu me Kériso. Ke geé caa ûmiê mu ha amele me weeng. Be geé caa céihi ne ko a junuu Padué na e pwo me e mulie cemwo. ¹³ Be

[†] **2:8** 2.8 Na e âbé mu ko ni duéé... ai A bwo niimihi nen, ne ko a bwo pwo na a bwohemwo me a miiden. **2:9** 2.9 Ioane 1.14,16

[‡] **2:9** 2.9 Piwielu me Padué Caa... Grek: Wo Padué, ke e mu ati ko Kériso. **2:10** 2.10 Éfésó 1.21-22 **2:11** 2.11 Roma 2.29

2:12 2.12 Roma 6.4 **2:13** 2.13 Éfésó 2.1,4-5

é ânebun, ke wogewé ni apulie mele [be time e uce mu kowé *a ju mulip] é mu ko ni ta pwo tewé. Ke é ha a benaamwon naa, ke time uce téele tahagéi taabwon nina e teko pwo me geé âcehi nina ta§.

Ke é jenea, ke wo Padué, ke e pwo me nye pimulie ibu me Kériso. Ke e caa pineuhi ati ni ta pwo tenye. ¹⁴ Ke e caa ciitili ni 'kérédi' tenye [a bwopiinen pie ati ni naado na nye pwo na ta] na o bo tautikenye kon âcehi ni patén. Ke e pwo me tieden ni niihe ni naado naa, be e caa cemeite ne ko a *kuricé [he li e mele wo Kériso. ¹⁵ Be é mu ko a kuricé] ke e piwéden koja ni jenenaado me lépwo daame [he a melepiing na lé cubwonieng]. Ke e cielé, ke e pwo me tice niihelé, ke e teuulé ngen [ne he ni bwo tanim jélé] ne ânebuhe ni apulie ati*.

Ni patén na ni gele

¹⁶ [Geé nemwo pwo me lé ne ce patén dewé ne ce apulie.] Ke geé nemwo pwo me lé tautikewé mu ko celi geé wii, ai celi geé ûdu, ai ni béé tan [na lé niimihi pie iitihii] heme tebwo a wole, ai a céiu tan ne ha a naadenitan. ¹⁷ [Lé âcehi ninaa ânebun ne ni apulie] kehe te ju ni déme nina me

§ **2:13** 2.13 2^e phrase—Grek: Ke é mu ko anaa, na time uce pwotegoop tewé. **2:14** 2.14 Éfésó 2.14–16; 1 Pétéru 2.24

* **2:15** 2.15 Ni Roma, nina lé pihuôhi a bwohemwo ha a benaamwon naa, ke lé mu pé ati lépwo coda na lé piwéden kojale ne ko pa, ke lé habwiilé ne he pwahamii ni apulie ati ne he a bwo pitanim jélé. Weengaa a ocine ko Kériso na e piwéden ati koja ni duéé me ni pihuô na lé cubwonieng. **2:16** 2.16 Roma 14.1–12

2:17 2.17 Ébéru 8.5

e bo âbé. Ke caa pacuwahi ati ninaa jena ne ko Kériso†.

¹⁸ Geé nemwo pwo me lé pacuwokewé koja a pipwodéén dewé. Be nime ni béén me nye pipaunu ni *âcélo, ke lé te nihe âcehi ni niûlé. Te junihe pwo ni bwo temehinaado telé [na lé pii pie e âbé mu ko Padué] ke lé te nihe pipii delé ne kon. Kehe icehi ana te ju ni bwo niimihinaado te pa apulie!

¹⁹ Ke muhi telé me lé mu ko Kériso, pa punin. Be é mu ko a punin na e pwopweehi ati ni piduaan ne ko a één, beme céiu jélé ko ni acipetééhi kon me ni mehieng. Ke e pwo me ubwo jélé wo Padué.

E tuwokewé koja ni huô na ta

²⁰ Wogewé, ke geé caa mele me Kériso, ke e caa tuwokewé koja a junuu a pihuô pwo bwohemwo‡. Ke é mu ko ade na geé mwo teko mulie he ni pihuô naa? Be geé mwo teko piténedehi ni patén [ko a pwoiitih]. ²¹ Be lé pii pie: «Geé nemwo pé ani, ke geé nemwo wii ani, ke geé nemwo ti ko nini!»

²²⁻²³ Ke ni patén naa, ke ni bépwonon ne ko ni naado na o bo tieden hemepie nye penem kon. Lé niimihi ne ni béé apulie pie, ni bwopwonon me nye mulie ne ha a mulip na wâé te Padué. Be lé pii pie, te wâé heme nye te nihe pwo me piwahin genye, ke me nye pwo me e mu he

† **2:17** 2.17 Dernière phrase—Grek: Ana junaado, ke wo Kériso.

2:19 2.19 Éféso 2.21, 4.16 **2:20** 2.20–21 Galat 4.3,9; 1 Timoté 4.3 ‡ **2:20** 2.20 A pihuô pwo bwohemwo—ai Ni duée. **2:22-23** 2.22 Mataio 15.9

ni picani na a éénye. Ûhu! Te ju piticenaado ne kon! Be te ju ni patén na e âbé mu ko pa apulie. Kehe te tice niihelé me lé pacuwohi nina nimenye kon na lé pwo me nye pwo nina ta.

3

Genye mulie ha a mulie he Kériso

¹ [Wo Padué, ke e] pwo me geé mulie cemwo mu ha amele me Iésu Kériso. Ke e mu he miiden wo Kériso *pwo a jui Padué [beme e pihuôhi ati ni naado]. É nelang, ke wâé heme geé hane ni naado na e he miiden. ² Ke geé ne ni pwonimewé ne ko ninaa, kehe time uce ni naado éni pwo bwohemwo.

³ Be geé caa mele* pwohewii Kériso. Ke a ju mulihewé, ke neduwohi ibu me Kériso ne he Padué. ⁴ Kehe me e bo pihabwiieng, ke geé bo pimu ibu me weeng†, he geé bo mu ha a bwo ubwo nang me *a wâé ten.

Geé necu ni bwomu tewé na ta

⁵ Weengaa kuti a watihen me geé necu nina ta na nimewé kon, na e mwo teko mu kowé‡. Geé nemwo niimihi pie me geé pipule hauli me ce béén, ke geé nemwo pwo ni naado na ta ne ko ni ééwé. Ke geé necu ni bwo niimihinaado na tanim genye kon. Ke geé nemwo hane me

3:1 3.1 Maréko 12.36, 16.19; Éféso 1.20 **3:2** 3.2 Mataiao 6.33 * **3:3** 3.3 Geé caa mele—A bwopiinen pie: Caa nebwen ni mulihewé ânebun, na e âcehi nina te nimewé kon na ta. † **3:4** 3.4 Geé bo pimu ibu me weeng—Grek: Geé bo pihabwiikewé. **3:5** 3.5–6 Roma 6.6,11; Éféso 4.19, 5.3–6 ‡ **3:5** 3.5 Nina ta na nimewé kon... Grek: Ni naado mu ko a bwohemwo.

pihiwon dewé ni naado ne éni pwo bwohemwo, be, me geé ne ni pwonimewé ko ni naado naa, ke pwohewiin heme geé pipaunu ni duéé hauli. ⁶ Ke wo Padué, ke e okéé ne ko lépwona lé wonaa ni bwomu telé§ [ke e bo tautilé, ke e bo ne telé a kuhinaado ko ninaa].

⁷ Ânebun, ke geé wonaa, he geé mwo mulie he ni bwomunen na ta. ⁸ Kehe é jena, ke [lé pii tewé pie] geé necu ninaa! Geé necu mwo a okéé, ke ni piéi. Geé nemwo pwotahinaado ne ko lépwo béén, ke geé nemwo piciheta ne kolé. Geé nemwo pii ni pwooti na ta, na time uce wâé me genye pii. ⁹ Ke geé nemwo geti ni acéihi bééwé.

Geé caa céi a epwén na alili

[Ati ninaa, ke pwohewii a epwén na alili, na] geé caa céi. [Be geé caa necu] a bwo mulie tewé ânebun, me ni bwomu tewé na ta. ¹⁰ Ke geé caa cuwohe [a céiu epwén] na mwo wâé.

Ke e tee penem kowé wo Padué, pana e nekewé, beme geé te pipwohewiieng, ke me geé temehieng ehi. ¹¹ [Ke a mulie na mwo coho na e ne tewé] ke caa te tice celi pi-ité koja lépwo Juif, me lépwona time uce lépwo Juif: lépwona *tegoop jélé, me lépwona time uce tegoop jélé. Ke caa te tice penebé*, me ce kepune. Ke caa te tice lépwona lé 'pitemang', me lépwo 'apulie bwolihi'†. Ke caa te tice celi pi-ité koja lépwo

§ **3:6** 3.6 Lépwona lé wonaa... Ni béé tii iitih he pwo grek, ke lé pii pie Lépwona lé cubwonieng. **3:8** 3.8 Éfésó 4.25–29, 5.4

3:9 3.9 Éfésó 4.22,25 **3:10** 3.10 Éfésó 4.24 **3:11** 3.11 Galat 3.28 * **3:11** 3.11 Penebé—Lépwona coho. † **3:11** 3.11 Lépwona 'apulie bwolihi'—ai Lépwona te tice pitemang delé: primitifs.

*apenem tice ja kon, me ati lépwo béén. Kehe ana junaado, ke wo Kériso, ke te weeng cehi. Ke tai e konye ati.

¹² E pipwoééhewé wo Padué, ke e pipégalikewé beme wogewé a puapulie ten na iitihí. Ke wâé heme geé pipwoééhe, ke me geé te cuwo ko pwo nina wâé ne ko ni apulie. Ke wâé heme bwala gewé, ke me geé pwo me piwahin gewé, ke me geé cumang ne ha a piuca. ¹³ [Geé mu ehi me lépwo acéihí bééwé, ke] geé picani ne kolé. Ke geé pineulé heme lé pwo ce naado celi time uce wâé tewé. Be e caa pineukewé wo Padaame!

¹⁴ Ana junaado, ke a pipwoééhe. Be anaa kuti a tai na e pineibukenye, ke e ciekenye, beme te céiu genye na ati he ni naado.

¹⁵ E todekewé wo Padué, beme geé pwohewii a éé apulie na te céiu, ke me e mu kowé a péém na e âbé mu pele Kériso. Ke wâé heme a péém naa, ke me e pé ati ni pwonimewé [me ni bwo niimihinaado tewé]. Ke me geé tee pwo-olé ten. ¹⁶ Wâé heme e mulie ne kowé ni pwooti te Kériso me ati ni *adéihí na e pébé céiikewé.

Geé pipacémunikewé, ke geé pipamwoiukewé ko ni bwo temehinaado [na e ne tewé]. Ke geé pwo-olé te Padué mu he ni ju pwonimewé. Ke geé pwonyebi ko ni *psaume*, me ni *cantique*, me ni nyebi na e ne tewé na a *Jenen Iitihí.

3:12 3.12 1 Pétéru 2.9 **3:13** 3.13 Éfésó 4.2,32 **3:14** 3.14 Roma 13.8-10 **3:15** 3.15 1 Korénit 12.27; Éfésó 4.4; Filipi 4.7
3:16 3.16 Éfésó 5.19

¹⁷ Ati nina geé pwo, me nina geé pii, ke me geé pwo ne he nii Padaame Iésu Kériso. Ke [ati ne he ni naado] ke geé pwo-olé te Padué Caa, mu ko nina e pwo wo Kériso me dewé‡.

Ni pwomwo na lé céihi

¹⁸ Wogewé ni toomwo, geé pwo me piwahin gewé ne ko ni aiu hewé. Be te wonaa [ne ko êna e céihi] ne ko Padaame.

¹⁹ Wogewé lépwo aiu, ke geé pipwoééhe ni pétaapwo mwodewé [ne ha a péém] ke geé nemwo pwohuu telé.

²⁰ Wogewé ni ewa, ke geé piténede ni nyaa me caa tewé ne ko ati ni naado. Be wâé te Padaame ni bwomunen na wonaa.

²¹ Wogewé lépwo caa te ewa, geé nemwo tee pwohuu te ni naîwé. Be koli geé bo pipatupwolé.

Lépwo apenem me ni caa telé

²²⁻²³ Wogewé lépwo apenem tice ja kon, ke geé piténede ni caa tewé na ati he ni naado ne éni pwo bwohemwo, mu he ni ju pwonimewé. Ke geé penem ehi he ni benaamwon na lé wéa kowé hen, ai heme tielé pelewé. Be time geé uce penem beme e piwâékewé wo pace céiu apulie, be geé penem me de Padaame. Be weeng ke pa apihuô tewé na me geé paciitieng, ²⁴ ke te weeng na me geé penem den. Be geé temehi pie, e bo ne tewé a cemewé ko ni penem dewé, na e pwopweehi me de a puapulie ten.

3:17 3.17 1 Korénit 10.31; Éféso 5.20 ‡ **3:17** 3.17 Mu ko nina e pwo wo Kériso... ai É ne he nii Kériso. **3:18** 3.18 Éféso 5.22

3:19 3.19 Éféso 5.25 **3:20** 3.20 Éféso 6.1 **3:21** 3.21 Éféso 6.4 **3:22-23** 3.22 Éféso 6.5-8

²⁵ Kehe wo pana e pwo ana ta, ke e bo hegi a kuhinaado ten. Be wo Padué, ke time e uce pipwoinen ne ko ni apulie.

4

¹ Wogewé lépwo caa te lépwo *apenem tice ja kon, ke wâé heme geé pwopweehi ne kolé. Ke geé nemwo pineuhi pie, wogewé mwo, ke te pwo pa apihuô tewé na e jeda he miiden.

Bénebwéne pwooti

² Geé te cuwo ko pwoiitihi. Ke geé ûmiê ne ko ni pwopwoiitihi tewé, ke geé te cuwo ko pwo-olé te Padué. ³ Ke geé pwoiitihi mwo me deme, beme e bo ne teme ace bwopwonen me geme pii beetihi a pwooti ten. A pwooti ko *a bwo niimihinaado ten na e ha aduwo, [ke caa pacuwohi jena ne] ko Kériso. [Geé pwoiitihi me dong mwo] be é ko mu éni he karépu, mu ko a bwo patemehi nen dong a pwooti naa. ⁴ Ke geé pwoiitihi, beme o pwaale ne telé ni pwooti na é pii. Be weengaa a penem na e ne tong.

⁵ Ke geé engen ha a pitemang ne pele lépwona time uce lépwo acéihi, ke geé penem ehi he ni benaamwon na e mwo ko ne tewé wo Padué. ⁶ Geé pacihelé ehi, beme o nimelé me lé te tabemikewé*. Ke wâé heme geé temehi me

3:25 3.25 Roma 2.11 **4:1** 4.1 Éféso 6.9 **4:2** 4.2 Éféso 6.18; Filipi 4.6 **4:3** 4.3 Roma 15.30; Éféso 6.19 **4:5** 4.5 Éféso 5.15–16 **4:6** 4.6 Éféso 4.29; 1 Pétéru 3.15 * **4:6** 4.6 1^{re} phrase—Wo Paulo, ke e pwo-ocine he pwo grek, be e pii pie, a bwo cihe tenye na wâé, ke pwohewii a wiinaado na pwo jié ne hen, ke wâé a nemen.

geé hegi ehi ne te ni apulie ni naado na lé tahimwokewé kon.

Adéikewé

⁷⁻⁹ É pahede Tichike, pa bééng ko penem, me e âdé céikewé, woilu me Onésime, pana e âbé mu pelewé. Lupwo ju béénye, ke lupwo eabwé na lu te junihe piténede Padaame. É pahedelu lé céikewé, beme lu piuti tewé a jepule kong, ke me lu pamwoiukewé.

¹⁰⁻¹¹ Lé ne lé a bwocu tewé mwo wo Maréko†, pa béé Barnabas; me Iésu‡ na pii kon pie Justus, me Aristarke, na gemu tai mu he karépu.

Hiwon ni Juif na lé caa céihi ne ko Kériso, kehe te icehi lépwonaa mu kolé na lé picani tong. Ke lé pamwoiuéo ne he ni penem ko a *Mwametau te Padué.

Mepwo é ne ko Maréko, ke wieli e bo âdé céikewé. Ke hemepie wonaa, ke wâé heme geé hegieng ehi, pwohewii ana geme pii tewé ânebun.

¹² Ke e ne mwo a bwocu tewé wo Épafras, pana e âbé mu pelewé, pa eabwé te Kériso Iésu. Be e te pwopa me dewé ne he ni pwopwoiitihi. Ke e te cuwo ko ilehi koja Padué pie, me geé cumang

4:7-9 4.7-8 Éféso 6.21-22 **4:7-9** 4.9 Filémon 1.10-12
4:10-11 4.10 Apostolo 12.12, 13.13, 15.37-39 † **4:10-11**
 4.10-11 Maréko—A céiu niin mwo, ke Ioane, ai Ioane-Maréko. Omehi Apostolo 12.12. Wo panaa, ke weeng pa apwo Tii te Maréko. Omehi mwo 2 Timoté 4.11; Filémon 1.24; 1 Pétéru 5.13. ‡ **4:10-11** 4.10-11 Iésu—Time uce wo Padaame Iésu Kériso. Hiwon lépwo apulie na niilé pie Iésu ne pele lépwo Juif, pwohewii lupwo nii apulie na Bwaé me Hiê ne pelenye. **4:12**
 4.12-14 Kolosé 1.7; 2 Timoté 4.10-11; Filémon 1.23-24

ne he ni céihi tewé, ke me geé temehi ni naado na nime Padué kon, ke me geé piténeeng. ¹³ É *pajuujihi pie, e te junihe mwoiu ko penem me dewé, ke é ne mwo ko ni acéihi na lé mu he lupwo pwomwo ubwo Laodicé, ke é Iéropolis.

¹⁴ Ke lu ne a bwocu tewé mwo wo Luka, pa dotéén na te junihe eânimung den, me Démas.

¹⁵ Geé pii te ati ni acéihi béénye ne ha a pwomwo ubwo Laodicé pie geme pwobwocu telé. Ke me bwocu mwo te Nimfa, me ni acéihi na lé mu pitapitilé ne pelen.

¹⁶ Ke mepie geé caa pine ati a tii ce ne pelewé, ke geé ne te ni acéihi ne Laodicé, beme lé pine mwo. Ke geé pine mwo a tii tong na lé bo ne lé céiikewé.

¹⁷ Ke geé paniimihi te Arkipe pie, wâé heme e panebwénihi ehi a penem na e ne ten wo Padaame.

Bépinelé

¹⁸ Woéo Paulo, ke é pé a bépwotii beme é panebwénihi a tii ce. Ke geé nemwo pineuhi pie, mwo teko woéo éni he karépu.

Ke me e mu kowé a *pipwoééhe tice ja kon de Padué!

Adéikewé!

**Tii Iitihi: Élele Iitihi na mwo Coho
Cemuhi: Tii Iitihi: Élele Iitihi na mwo Coho (New
Testament)**

copyright © 2017 Wycliffe Bible Translators, Inc.

Language: Cemuhi

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

f8ee0ae8-19d4-5493-b0f2-3132fc194785